

2017-imut Aningaasanut Inatsisissatut siunnersuut (Aningaasaqarnermut Akileraartarnermullu Naalackersuisoq)

Akissuteqaat

(Aningaasaqarnermut Akileraartarnermullu Naalackersuisoq)

2. Suliarinnineq

Aallaqqaasiut

Aallarniutigalugu Aningaasaqarnermut Akileraartarnermullu Ataatsimiititaliap 2017-imut aningaasanut inatsisissatut siunnersuummik, Naalackersuisullu allannguutissatut siunnersuutaasa matumani aappassaaneerneqarnissaanni peqqissaartumik sulisimaneranut Naalackersuisut sinnerlugit qujaniarpunga.

2017-imut aningaasanut inatsisissatut siunnersuutip matumuuna aappassaaneerneqarnera siusinnerusukkut 11. novembarimi suliarineqartussatut naatsorsuutigineqarsimavoq, 15. novemberimili pingajussaaneerinnineq pissalluni. Naalackersuisuniilli piunasaqartoqarneratigut Inatsisartut Siulittaasoqarfiata aappassaaneerinninnissaq pingajussaaneerinninnissarlu 15. aamma 21. novembarimut nuutsippaat. 27. oktober 2016-imi nutaanik naalackersuisooqatigiittoqalenera tunuliaqutaralugu Naalackersuisut taamatut piunasaqarput.

Aappassaaneerinninnissamut allannguutissatut siunnersuut

Massakkut aappassaaneerinninnissamut missingersuutininut ilanngussassanut tunngatillugu Naalackersuisut katillugit 82-inik allannguutissatut siunnersuuteqarput oqaasertaliussanullu tunngatillugu 17-inik allannguutissatut siunnersuuteqarlutik. Tamatuma saniatigut Inatsisartut Suleriaaseq pillugu Ataatsimiititaliaat ataatsimik allannguutissatut siunnersuuteqarpoq. Allannguutissatut siunnersuutit piffissamut aningaasanut inatsiseqarfiusumut 2017-2020-mut tamarmiusumut IST-p inernissaatut missingersuutigineqartut 0,9 mio. kr.-nik ajorseriaateqartitsipput.

Allannguutissatut arfinilinnik siunnersuuteqartoqarpoq, isertitassatut inatsisitigullu pisuffaaffiumik aningaasaliissutit allannguuteqarfigisaannik. Allannguutissatut siunnersuuteqarnikkut IST-p inernissaatut missingersuutigineqartut 2017-imi 55 mio. kr.-nik, kiisalu ukiuni missingersuusiorfiusuni 2018-2020-mi ukiumut 25 mio. kr.-nik pitsanngoriartinneqarput. Pingaartumik raajat akisunerisa raajanut akitsuutinit, kiisalu aalisarnermik suliassaqarfimmi ingerlatseqatigiiffinit, taakkununga ilanngullugu Royal Greenlandimit iluanaarutinit ingerlatseqatigiiffiillu akileraarutaannit Nunatta Karsianut isertitaqarnerulissutaasussat kingunerisaannik aalisarneq ineriartorluarmat IST-p inernissaatut missingersuutigineqartut pitsanngoriaateqarujussuarput. Taamaattorli avaleraasartoorniarnermut tunngatillugu ukiumut iluanaarutit 2017-imit siumut 10,5 mio. kr.-nik ammut iluarsineqarnerat 2016-imi pisakinnerup kinguneraa. Tamatuma saniatigut isertitat

2017-imi 17 mio. kr.-nik qummut iluarsineqarput, tamannalu Greenland Contractorsip Pituffimmi kiffartuussinissamik isumaqatigiisummik 2016-ip ingerlanerani arlaleriarluni sivitsuisarsimaneramik tunuliaqutaqarpoq. Tamanna tunuliaqutaralugu Greenland Holdingip Greenland Contractorsimik piginneqataanermigut 2016-imisulli qaffasitsigisumik 2017-imi akileraaruteqarnissaa naatsorsuutigineqarpoq, ukiumut naatsorsuuteqarfiusumut 2016-imut ingerlatseqatigiiffiit akileraarutaat 2017-imi akiligassanngortussaammata.

Sammissaq 9-mi: Aningaasanut Inatsit pillugu isumaqatigiisummi 14-inik allannguutissatut siunnersuuteqartoqarpoq, IST-p inernissaatut missingersuutigineqartut piffissami aningaasanut inatsiseqarfiusumi tamarmiusumi 2017-2020-mi ukiumut agguaqatigiissillugit ukiumut 15 mio. kr.-nik ajorseriaataasussanik. Sammisami tassani allannguutissatut siunnersuutit pingaarnerpaat tassaapput ilaasunik angallassinermut tapiissutitut kontup ukiumut 18,1 mio. kr.-nik ilaniarneqarnera, aningaasat taakku ilaasunik angallassinermut kiffartuussinissamut isumaqatigiissutitut nutaanut taakkununga ilassutitut isumaqatigiissuteqarnermut atorneqassapput. Ilassutitut isumaqatigiissuteqarnikkut Kujataani Qeqertarsuullu Tunuani angallassinikkut pitsaanerusementik sullissinissaq qulakkeerneqassaaq. Ilassutitut isumaqatigiissuteqarnissamik, kiisalu aningaasaqarnikkut kingunerisassanik misissuineramik suliaqartoqalereerpoq 2017-imullu aningaasanut inatsisissatut siunnersuutit pingajussaaneerneqannginnerani naammassereersimassangatinneqarluni. Tamanna naapertorlugu Naalakkersuisut pingajussaaneerinninnissamut allannguutissatut siunnersuuteqarnissartik naatsorsuutigaat.

Tamatuma saniatigut suliniutitut nutaanut sillimmatini isumaginninnermut tunngasuni meeqqanut inuusuttunullu siusissukkut iliuseqartarnermut 2017-imi 6,5 mio. kr.-nik 2018-imilu 10 mio. kr.-nik immikkoortitsiniartoqarpoq. Aammattaaq efterskolernermit nunatsinnilu efterskoleqarnermit ingerlatsinnermit aningaasaliissutit ukiumut katillugit 4,5 mio. kr.-nik aningaasaliiffiginiarneqarput. Taamaaliornikkut nunatsinni efterskolit pitsanngorsarneqassapput tamatumalu Nunatsinni Danmarkimilu efterskolertarnerup siunissami ilaqutariinnut isertitakitsunut akeqarunnaarnissaa nassatarissavaa.

Isumaginninnermi Naammagittaalliuuteqartarfimmi suliat suliarineqartarnerat sivikillisarnerarlugu naammagittaalliuutillu suliarilluarneqarnerulersinniarlugit Atuisartoqarnermut Unammilleqatigiinnermullu Aqutsisoqarfimmut aningaasaliissutit 2017-2019-imi ukiumut 1,5 mio. kr.-nik ilaniarneqarput. Naammagittaalliuuteqartarfiup piffissami pineqartumi suliat ilungersunangitsut ullumikkornit pilertornerusementik suliarineqarsinnaangorlugit suleriaatsinik nutaanik aaqqissuussinissaa naatsorsuutigineqarpoq. Aammattaaq saarulleqarneranik, qaleraleqarneranik appaqarneranillu nakkutilliinissamut Pinngortitaleriffik aningaasaliiffiginiarneqarpoq.

Suliniutit nutaat ilarpassuisa sipaarutigineqartunik 2018-imi ukiunilu tulliuutit pisussanik aningaasalersorneqarnissaat 2017-imut aningaasanut inatsit pillugu isumaqatigiisummi ilaatinneqarpoq. Namminersorlutik Oqartussani kommuninut tunngatillugu marloriaammik allaffissornerup annikillissinneratigut ukiumoortumik sipaaruteqartarnikkut 5 mio. kr.-t 2018-imit atugassanngortinneqarnissaat sipaarniarnerup nassatarissavaa. Tamatumani ilaatigut

Namminersorlutik Oqartussani aningaasanik toqqortanik tapiissutinillu aqutsinerup kommuninut ullumikkut aningaasanik atuisuviusunut nuunneqarsinnaanissaasa naatsorsuutigineqarnera ilaavoq. Tamanna aamma suliassanik kommuninut nuussinissamik kissaateqarnermut naapertuutissaq.

Tamatuma saniatigut nioqqutissanik sullissinernillu pisiortornermi 2018-imi 5 mio. kr.-nik, 2019-imi 10 mio. kr.-nik 2020-milu 15 mio. kr.-nik sipaaruteqartoqassaaq. Inatsisartut imm. UKA2015/118-imi akuersinerisa Naalackersuisut neqerooruteqartarneq pillugu inatsissamut nutaamut siunnersuuteqarnissaannik peqqusiviusup nanginneratut suliniut pivoq. Suliniut Namminersorlutik Oqartussani pisiortortarnerup pikkoriffigineqarnerulerneratigut piviusunngortinniarneqarpoq. Namminersorlutik Oqartussani pisiortortarnerup pikkoriffigineqarnerulersinniarnera neqerooruteqartitsisarneq, pisiortortarneq digitalinngortitsinerlu pillugit kaajallaasitanut nutaanut tunngaviit, kiisalu neqerooruteqartitsisarneq pillugu inatsit nutaaq atorlugit qulakkeerniarneqarpoq. Sipaarniutissatut missingersuusiorneqartut naatsorsuutigisatut anguniarneqassappata neqeroortarneq pillugu inatsit kingusinnerpaamik 2018-imi piviusunngortinneqareersimassaaq.

Aningaasaqarnermut Akileraartarnermullu Ataatsimiititaliap aappassaaneerinnittoqarnissaanut isumaliutissiissutaa

Naalackersuisunit allannguutissatut siunnersuutigineqartut tamarmik akuerineqarnissaat Aningaasaqarnermut Akileraartarnermullu Ataatsimiititaliap aappassaaneerinninnissamut isumaliutissiissummi inassutigai. Aningaasaqarnermut Akileraartarnermullu Ataatsimiititaliap allannguutissatut siunnersuutigineqartunut akuersaartumik isummerneru Naalackersuisut qujassutigaat.

Pingajussaaneerinnittoqarnissaanut allannguutissatut siunnersuutigisassatut ilimagineqartut

27. oktober 2016-imi nutaamik naalackersuisooqatigiittoqalernerata nutaanillu Naalackersuisoqalernerata kingunerisaanik pingajussaaneerinninnermi allannguutissatut arlalinnik siunnersuuteqartoqassanganneqarpoq. Aamma allannguutit pineqartut malillugit, tassunga ilanngullugu Naalackersuisut amerlineqarnerisa aamma Naalackersuisutut ilaasortaajunnartunut akissarsiaqartitsinissap il. il. malitsigisaannik aningaasaliissuteqaqqittoqarnissaa pisariaqartinneqassaaq.

Taamatuttaaq namminiilivinnissaq siunertaralugu suliaqarnissamut kiisalu Ilaqutariinnermut, Naligiissitaanermut, Isumaginninnermut Inatsisinillu Atuutsitsinnermut Naalackersuisoqarfiup ataani inunnik isumaginnermut aqutsisoqarfimmik pilersitsinissamut aningaasanik immikkoortitsinissaq pillugu allannguutissatut siunnersuummik saqqummiussisoqassasoq naatsorsuutigineqarpoq. Inunnik isumaginninnermut aqutsisoqarfiup sulinerup ullumikkut naalackersuisoqarfimmi isumagineqartartup ingerlatsinnermut tunngasortaa isumagisarilissavaa. Tamatumani ilaatigut Qitiusumik Siunnersuisarfik, kiisalu meeqqanik inuusuttunillu aamma innarluutilinnik ulloq unnuarlu paaqqinniffinnik ingerlatsineq pineqarput.

Kiisalu piffissami aningaasanut inatsiseqarfiusumi 2017-2020-mi isertitat aningaasartuutillu sapinngisamik oqimaaqatigiissinneqarnissaannik qulakkeerinniffiusumik allannguutissatut siunnersuuteqartitsiniartoqassaaq.

Naggasiut

Naggasiullugu 2017-imut aningaasanut inatsisissatut siunnersuut pillugu naalackersuinikkut isumaqatigiinniarnernut atatillugu ajunngitsumik angusaqarfiusumillu sulisoqarsimaneranut partiit tamaasa Naalackersuisut sinnerlugit qujaffiginiarpakka. Taamaalilluni 2017-imut aningaasanut inatsit pillugu kaammattuilluartoqarnissaanut tunngavissaqarnissaa Naalackersuisut neriuutigaat.

Taamatut oqaaseqarlunga inersuarmi maani aningaasanut inatsisissaq pillugu ajunngitsumik angusaqarfiusumillu oqallittoqarnissaa qilanaaraara.